

南
北
史
合
注

欽定四庫全書

南北史合注卷一百七

明李清撰

列傳第九

北史二十一

衛標

莫含

劉庫仁

弟子羅辰羅辰曾孫仁之

尉古真

從玄孫瑾

穆崇

子亮

奚斤

叔孫建

安同

庾業延

王建

羅結

婁伏連

曾孫賈

閻大肥

奚牧

和跋

莫題

賀狄干

李粟

衛操字德元代人少通俠有才略晉征北將軍衛瓘以
操為牙門將當魏神元時頗自結附神元殂與從子雄
及其宗室鄉親姬澹等來歸說桓穆二帝招納晉人桓

帝以為輔相任以國事及劉石之亂桓帝匡助晉氏
魏書曰操勸桓帝匡助晉氏東嬴公司馬騰聞而善
之

操稍遷至右將軍封定襄侯桓帝殂操立碑大邦城南
以頌功德云魏軒轅苗裔桓穆二帝統國御衆威禁大
行國無奸盜路有頌聲威武所向無交兵招喻六狄
咸來歸誠奉承晉皇捍禦邊疆王室多難天網弛網豪
心遠濟靡離其殃歲翦逆命奸盜豺狼永安元年歲次

甲子奸黨猶逆東西狼踣敢逼天王兵甲屢起怙衆肆
暴虐用將士鄴洛構隙棄親求疏乃招異類屠各匈奴
魏書載碑云劉淵奸賊結黨同呼敢擊并土殺害無
辜

交刃千里長蛇塞塗晉道應天言展良謨使持節平北
將軍并州刺史護匈奴中郎將東廡公司馬騰才神絕
世規略超遠欲求外救朝臣莫應簡賢選士命茲良使
遣參軍壺倫牙門中行嘉義陽亭侯衛謨協義亭侯衛

韃等馳奉檄書至晉陽城又稱桓穆二帝心存宸極輔
相二衛對揚毗翼採展文謨雄奮武烈承命會議諮論
奮發

魏書曰二衛到鎮言若合符會盟汾東命將先驅南
救涅縣東解壽陽太原西河樂平上黨羯賊肆虐六
郡凋傷旌旗輕指羯黨破散遣騎十萬前臨淇漳鄴
遂振潰凶黨奔亡軍據州南耀鋒太行

翼衛內外鎮靜四方志在竭力奉戴天王忠恕用暉外

勲亦攘

魏書曰周覽載籍自古迄今未聞外域奔救內患惟
公遠略臨難能權又云非桓天挺忠孝自然孰能超
常感公之言

功濟方州勲烈光延升母之日納貢充藩馮瞻鑿蓋步
趾三川有德無祿天命不延年三十九以永興三年六
月二十四日寢疾薨殂背棄華殿雲中名都國失惠主
哀感啟歎悲痛煩寃載呼載號遠近親軌奔赴梓廬仰

訴造化痛延悲夫

又云桓帝忠於晉室駿奔長衢隆冬淒淒四出行誅
蒙犯霜雪疹入肌膚用致薨隕不永桑榆以死勤事
載美晉書平北京悼祭以豐厨考行論勲謚曰義烈
又云桓帝王有北方行能濟國羯胡因釁敢害并土
率衆百萬平夷險阻存亡繼絕一州蒙枯功烈桓桓
龍文虎武刊石勒銘垂示後昆 愚按後魏遠祖翼
戴晉室故其後人奄有中原此推本之論也凡碑文

中與晉事相涉而為北史削去者皆補存之

時晉光熙元年也皇興初雍州別駕鴈門段榮於大邗掘得此碑故略附於傳採以穆帝三年卒始採所與宗室鄉親入國者衛勲安樂亭侯衛崇衛清並都亭侯衛沈段繁並信義將軍都鄉侯王發建武將軍都亭侯范班折衝將軍廣武亭侯賈慶建武將軍上洛亭侯賈循都亭侯李壹關中侯郭乳關內侯皆桓帝所表授也六脩之難存者多隨劉琨任子遵南奔衛雄姬澹莫含等

名皆見碑雄字世遠澹字世雅並勇健多計桓帝並以
為將常隨征伐雄稍遷至左將軍雲中侯澹亦以勇績
著名桓帝末至信義將軍樓煩侯穆帝初並見委任衛
操卒後俱為左右輔相六脩之逆國內大亂雄澹並為
羣情所附

魏書曰二人謀欲南歸言於眾曰聞諸舊人忌新人
悍戰欲盡殺之吾等不早為計恐無種矣晉人及烏
丸懼皆曰死生隨二將軍

乃與劉遵率烏丸晉人數萬而叛劉琨聞之大悅如平
城撫納之欲因以滅石勒

魏書載雄澹二人諫曰亂民飢疲未可使用宜休息
觀釁而動琨不聽

後為勒將孔長所滅

莫含鴈門繁峙人劉琨為并州辟含從事含居近塞下
常交國中穆帝愛其才器及為代王備置官屬求含於
琨琨喻遣之

魏書曰琨遣入國舍不願琨曰當今胡寇滔天泯滅
諸夏惟此一州介在羣胡以吾薄德能自存立實賴
代王長子遠贊冀雪大恥卿何惜共事小誠以忘出
身大益若為代王腹心亦一州所賴

乃入參國官常參軍國大謀卒於左將軍關中侯其故
宅在桑乾川南世稱莫舍壁舍音訛又謂莫回城云子
顯昭成世為左常侍顯子題道武初為大將以功賜爵
東宛侍常與李栗侍宴栗坐不敬獲罪題亦被黜為濟

陽太守後道武欲廣宮室規度以題機巧徵令監之召
入與論興造之制題久侍頗怠賜死題弟雲好學善射
道武時嘗典選曹賜爵安德侯遷執金吾參軍國謀議
太武克赫連昌詔雲與常山王素留鎮統萬進爵安定
公雲撫慰新舊皆得其所卒謚曰敬公

劉庫仁字沒根獨孤部人劉虎之宗也少豪俠有智略
母平文女昭成復妻以宗女為南部大人昭成暴殂道
武未立秦王苻堅以庫仁為陵江將軍關內侯令與衛

辰分國衆統之河西屬衛辰河東屬庫仁於是獻明后
搗道武及衛秦二王自賀蘭部來居庫仁盡忠奉事不
以興廢易節符堅處衛辰在庫仁下衛辰怒叛攻庫仁
庫仁伐衛辰破之堅賜庫仁妻公孫氏厚其資送慕容
垂圍符丕於鄴又遣將平規攻堅幽州刺史王永於薊
庫仁自以受堅爵命遣妻兄公孫希助永擊規大破之
阮規降卒五千餘人庫仁復將大舉救丕發鴈門上谷
代郡兵次於繁峙先是慕容文等當徙長安遁依庫仁

却常思東歸是役也知人不樂文等夜率三郡人攻殺庫仁乘其駿馬奔垂希聞亂走丁零庫仁弟眷繼攝國事眷第三子羅辰機警有智謀謂眷曰從兄顯忍人心腹之疾願早圖之眷不以為意後庫仁子顯果殺眷又謀逆及道武即位討顯於馬邑追至彌澤大破之後奔慕容麟徙之中山羅辰即宣穆后兄也顯既殺眷羅辰遂奔道武顯恃強每謀逆羅辰輒先聞奏拜南部大人從平中原以功賜爵永安公以軍功除征東將軍定

州刺史卒諡曰敬四傳至仁之粗涉書史厯衛將軍西
兖州刺史諡曰敬仁之外示長者內多矯詐其對賓客
破牀弊席粗飯冷菜衣服故惡乃過逼下善候當塗能
為詭激每於稠人廣眾中或搃一奸吏或縱一孤貧大
言自眩淺識皆稱其美公能之譽動過其實性又酷虐
在晉陽曾營城雉仁之統監作役以小稽緩遂杖前殷
州刺史裴瑗并州刺史王緯齋神武大加譴責性好文
字吏書失體便加鞭撻言韻微訛亦見捶楚吏民以此

苦之而愛好文史敬重人流與齊帥馮元興交款元興
死後積年仁之營視其家常出隆厚時以此重之仁之
伯乞歸真君中除中散大夫性寬和與物無競未嘗言
人善惡曾遇患晝寢有奴偷竊乞歸詐睡不見亦不泄
之此奴走入柔然方笑言之亦無嗔色獻文未除主客
尚書孝文初位東雍州刺史賜爵永安侯卒于嵩字阿
龍好周人急與主仲興自平城被追赴洛家貧不能自達
嵩事事資遣宣武時仲興寵幸奏除給事坐事流元尋

立授大鴻臚卿

尉古真代人道武在賀蘭部賀染干遣侯引乙突等將肆逆古真知之密馳告道武染干疑古真泄其謀執拷之以兩車軸押其頭傷其目不服乃免之後從平中原以功賜爵東州侯明元初為鴻飛將軍鎮大洛卒於定州刺史子億萬襲古真弟諾以忠謹稱從道武圍中山先登傷一目道武歎曰諾兄弟皆毀目建功誠可嘉也賜安樂子從平姚平還拜國部大人

魏書曰諾太宗時為幽州刺史有惠政世祖時州民詣闕請諾復除幽州

太武時改邑遼西公

魏書曰兄弟並為方伯時人榮之燕王亂久民戶凋散諾在州前後十數餘年還業者萬餘家

卒第八子歡襲諾長子卷忠謹有父風明元時執事左右為太官令時侍臣受斤七入柔然詔卷追之遂至虜廷

魏書曰大禮聞故卷曰受斤負罪天子逃刑在此不
時執送是以來取

禽之大禮前因以驍烈聞太武即位命卷與散騎侍郎
劉庫仁等八人分典四部館奏機要加陳兵將軍

魏書曰卷西破柔然屢有斬獲又與侍御史安頡陰
謀設伏擒赫連昌

文成時拜侍中太尉封漁陽王與太宰常英等錄尚書
事文成北巡狩以寒雪方降議還卷曰今去都不遠而

旋北敵必疑我有內難雖方寒雪宜更進前帝遂度漠
而還以卷元老賜杖履上殿薨謚曰莊子多侯襲爵多
侯少有武幹獻文時假節領護羌戎校尉敦煌鎮將至
鎮求輕騎五千西入于闐兼平諸國因敵取資平定為
効弗許孝文初

魏書曰多侯獵於南山柔然遣部帥度拔入圍敦煌
斷其還路多侯且戰且前衝圍而入率衆出戰大破
之追北十餘里斬首千餘級

又求北取伊吾斷柔然通西域路帝善其計以東作方
輿難之為妻元氏所害多侯弟子慶賓善騎射有將略
稍遷太中大夫孝明時朝議送柔然主阿那瓌還國慶
賓上表固爭不從後阿那瓌因執行臺元孚後拜肆州
刺史時爾朱榮兵威漸盛曾經肆州慶賓惡之據城不
納榮襲之拘還秀容呼為假父後以母憂還都尋起為
光祿大夫督鎮汝陰還朝卒贈司空子瑾瑾少敏悟好
學慕善以國姓門資稍遷直後司馬子如執政瑾娶其

甥皮氏為妻由此除中書舍人後除吏部郎中齊文襄
遇害文宣命瑾在鄴北宮共高德正典機密天保中累
遷七兵尚書侍郎孝昭輔政除吏部尚書武成踐祚趙
彥深本子如賓僚元文暹和士開並帝鄉故舊共相薦
達任遇彌重又吏部銓衡所歸事多祕密由是朝之機
事頗亦預聞後為尚書右僕射卒武成方在三臺嚮宴
文暹奏聞命撤樂罷飲瑾外雖通顯閨門穢雜有女在
室忽從奔誘瑾遂以適婦姪皮逸人瑾又通寡嫂元氏

瑾嘗譏吏部郎中頓丘李構云郎不稽古構對令史云
我實不稽古未知通嫂得作稽古否瑾聞大慚然亦能
折節下士引接名流但不能別也好效吳人搖唇振足
為人所哂見人好笑時人比之寒蟬又少威儀子德載
以蒲鞭責之便投井瑾自臨井呼云兒出聞者皆笑及
位任重便大躁急省內郎中將論事者逆即嗔罵既居
大選彌自驕狠皮子賤恃其親通多所談薦大有受納
瑾死後其弟靜忽而發之子賤坐決鞭二百配北營州

初瑾為聘梁使梁人陳昭善相謂瑾曰二十年後當為宰相瑾出私謂人曰此公宰相後不過三年當死昭後為陳使主兼散騎常侍至齊瑾時兼右僕射鳴騶鼓吹昭復謂人曰二年當死果如言眷弟地干機悟有才藝馳馬立射五的時人莫能及太武時位庫部尚書加散騎常侍領侍輦郎奉上忠瑾尤善嘲笑太武見其效人舉措忻悅不能自勝甚見親愛參軍國大謀時征平涼試衝車以攻冢地干為索所縶折脅卒帝親往哭慟贈

中領軍燕郡公諡曰惠古真族玄孫聿字成興性耿介
孝明時為武衛將軍時領軍元乂執權百寮莫不加敬
聿獨長揖不拜尋出為涼州刺史涼州緋色天下之最
乂送白綾二千匹令染聿拒不受乂諷御史劾之驛徵
至京覆無狀還任卒

穆崇

內入諸姓丘穆陵氏孝文改穆氏

代人其先世効節神元桓穆時崇少事盜竊道武居獨

孤部崇往來奉給後劉顯之逆平文外孫梁卷知之密
遣崇告道武卷謂崇曰顯若知之雖剗割勿泄也因以
寵妻及所乘良馬付崇曰事覺吾當以此自明崇來告
難道武馳如賀蘭部顯果疑卷泄將囚之崇乃唱言梁
卷不顧思義助顯為逆今我掠得其妻馬足以雪忿顯
聞而信之得免窟咄之難崇外甥于植等與崇謀執道
武崇夜告道武道武誅植等北踰陰山復幸賀蘭部道
武為魏王崇從平中原位侍中豫州刺史太尉宜都公

天賜三年堯先是衛王儀謀逆崇預焉道武惜其功秘
之及有司奏謚帝親覽謚法述義不尅曰丁曰此當矣
乃謚丁初道武避窟咄難遣崇還察人心崇留馬與從
者微服入其營會有火光為春妾所識賊皆驚起崇求
從者不得因匿阮中徐竊馬奔走宿大澤有白狼向崇
號崇覺悟馳隨狼奔遂免難道武異之命崇立祀子孫
世奉焉太和中追錄功臣以崇配饗孝文追思崇勲令
著作郎韓顯宗選定碑文建於白登山四傳至泰本名

石洛孝文賜名以功臣子孫尚章武長公主拜駙馬都尉典羽獵四曹事以尚書右僕射馮翊侯出為定州刺史初文明太后幽孝文於別室將謀黜廢泰切諫乃止孝文德之故寵待隆至自陳久病乞為恒州許之泰不願遷洛潛圖叛乃與定州刺史陸叡及安樂侯元隆等謀推朔州刺史陽平王躋為主躋密表其事帝乃遣任城王澄發并肆兵討之澄先遣治書侍御史李煥單騎入伏出其不意泰等驚駭無計煥曉喻逆徒示以禍福

凶黨莫為用泰自度必敗乃率麾下攻煥郭門不克走出為人擒送孝文幸代泰等伏誅子士儒徙涼州後得還為太尉參軍事子子容少好學無所不覽求天下書逢即寫錄得萬餘卷魏末為兼通直散騎常侍聘梁齊受禪卒於司農卿崇嫡孫觀字閨拔襲崇爵以文藝知名明元中為左衛將軍館門下中書出納詔命及訪舊事未嘗遺漏尚宜陽公主拜駙馬都尉位太尉太武監國觀為右弼出則統攝朝政入則應對左右事無巨細

皆闕決焉終日怡怡無愠色勞謙善誘不以富貴驕人
太常八年暴疾薨年三十五明元親臨其喪悲慟左右
賜以通身隱起金飾棺喪禮一依安城王叔孫俊故事
贈宜都王謚文成太武即位每與羣臣談宴未嘗不歎
息殷勤以為自道武以來佐命勲臣文武兼濟無及之
者子壽襲爵尚樂陵公主拜駙馬都尉明敏有父風太
武愛重之擢為下大夫敷奏機辨有聲內外遷侍中中
書監領南部尚書進爵宜都王加征東大將軍壽辭曰

臣祖崇先皇之世屢逢艱危幸天贊梁眷誠心先告故
得効功前朝流福於後昔陳平受賞歸功無知今眷元
勲未錄臣獨奕世受榮豈惟仰愧古賢抑亦有虧國典
太武嘉之乃求春孫賜爵郡公駕征涼州命壽輔景穆
總錄機要內外聽焉次雲中將濟河帝別御靜室召壽
及司徒崔浩尚書李順謂壽曰柔然吳提與牧犍連和
今聞朕征涼州必來犯塞莫伏兵漠南殄之為易牧田
訖可分伏要害以待虜至引使深入然後擊之若違朕

指授為虜侵害朕還斬卿浩順為證非虛言也壽信卜筮言謂賊不至竟不設備吳提果至京邑大駭壽不知所為欲築西郭門請景穆避南山惠保太后不聽乃止遣司空長孫道生等擊之太武還以無大損傷故不追咎景穆監國壽與崔浩等輔政人皆敬浩壽獨陵之又自恃位任謂其子師曰但今吾兒及我亦足勝人不須苦教之遇諸父兄弟有如僕隸夫妻並坐共食而令諸父餒餘為時鄙笑薨贈太尉謚文宣子平國襲爵尚城

陽長公主拜駙馬都尉侍中中書監為太子四輔卒次子羆以兄伏干無嗣襲爵尚新平長公主拜駙馬都尉虎牢鎮將頻以不法致罪孝文以勲德之舊讓而赦之轉吐京鎮將深自剋勵後改吐京鎮為汾州仍以羆為刺史前吐京太守劉升在郡甚有威惠限滿還都胡人八百餘人詣羆請之前定陽令吳平仁亦有恩信戶增數倍羆以吏民懷之並為表請孝文皆從焉羆既頻薦升等所部守令咸自砥礪威化大行州人李軌郭及祖

七百餘人詣闕稱罷思德孝文以罷政和民悅增秩延
限後徵為光祿勳隨例降王為魏郡公累遷侍中中書
監穆泰反罷與潛通赦後事發削封為編戶卒於家宣
武時追贈鎮北將軍恒州刺史罷弟亮字幼輔早有風
度獻文時起家侍御中散尚仲山長公主拜駙馬都尉
封長樂王孝文時除征南大將軍領護西戎校尉仇池
鎮將宕昌王梁彌機卒子彌博立為吐谷渾所逼來奔
仇池亮以彌博允悖氏羌所棄彌機兄子彌承戎人歸

樂表請納之孝文從焉於是擊走吐谷渾立彌承而還
氏豪楊卜自延興以來從軍二十一戰前來鎮將抑不
聞亮表卜為廣業太守豪右咸悅境內大安徵為侍中
尚書左僕射時復置司州孝文曰司州始立未有察吏
須立中正以定選舉然中正之任必須德望兼資世祖
時崔浩為冀州中正長孫嵩為司州中正可謂得人公
卿等宜審推舉尚書陸叡舉亮為司州大中正後拜司
空參議律令例降爵為公時文明太后崩已過朞月孝

文毀瘠猶甚

魏書載亮表略曰位重者為世以屈已居聖者達命以忘情近蒙接見聖容哀毀一人過哀黎元馬繫

亮表請上承金匱遺訓下稱億兆之心時襲輕服數御常膳修崇郊祠垂惠咸秩詔曰苟孝悌之至無所不通今飄風亢旱時雨不降實由誠慕未濃幽顯無感也尋領太子太傅時將建太極殿帝引見羣臣於太華殿曰將營殿宇今欲徙居永樂以避罽埃土木雖無心毀之

能不悽愴今故臨對卿等與之取別此殿高宗所制爰
歷顯祖逮朕冲年受位於此但事來奪情將有改制仰
惟疇昔惟深悲感亮稽首請稽之卜筮又以去歲役作
功多太廟明堂一年便就若仍歲頻興恐民力凋弊願
待逾年帝曰有周創業經建靈臺洪漢受命未央是作
草創猶若此況朕承累聖之運欲及此時以就大功脩
短命也著蔡雖智其如命何當委之分豈假卜筮移御
永樂宮後帝臨朝嘗謂亮曰三代之禮日出視朝自漢

魏以來禮儀漸殺晉令有朔望集公卿於朝堂論政事亦無天子親臨之文今因卿等日中之集中前卿等自論政事中後與卿等共議可否遂命讀奏案帝親決之及遷都加武衛大將軍以本官董攝中軍事帝南伐以亮錄尚書事留鎮洛陽後帝自小平津汎舟幸石濟亮諫曰漢帝欲乘舟渡渭廣德將以首血汙車輪帝乃感而就橋渭之小水猶尚若斯汎洪河不測難出慮表帝曰司空言是也

冊府元龜載帝詔亮曰徐州表給歸化人廩誠宜許之但今荆揚不實書軌未一計萬戶投化歲食百萬若聽其給施則蓄儲虛竭雖得衆百萬猶未成一同且欲隨貧賑恤亮曰所存遠大實如明旨

及罷預穆泰反事覺亮上表自劾帝優詔令攝事固請乃許後徙頓丘郡公以紹崇爵宣武即位拜尚書令司空公薨宣武親臨小斂贈太尉諡曰匡子紹字永業尚琅邪長公主拜駙馬都尉歷殿中尚書遭所生喪免以

孝聞之又歷衛大將軍中書監侍中領本邑中正紹無
他才能而資姓方重罕接賓容領軍元乂當權薰灼曾
往紹宅紹迎送下階而已及靈太后欲廢乂猶豫紹贊
成之以功加特進侍中元順與紹同直嘗因醉入寢所
紹擁被而起正色讓順曰老身二十年侍中與卿先君
曾連職事縱卿後進何宜排突遂謝事還家詔喻乃起
又除侍中託疾未起故免河陰之害孝莊立爾朱榮徵
之紹以為必死哭辭家廟及見榮捧手不拜榮亦矯意

禮之顧謂人曰穆紹不虛作大家兒帝入宮尋授尚書
令司空進爵為王給班劍四十人仍如侍中時河南尹
李獎往詣紹獎以紹郡人謂必致敬紹又恃封邑是獎
國主匡坐不動獎憚其位望致拜而還議者兩譏焉未
幾降王復本爵普泰元年除驃騎大將軍開府青州刺
史加都督未行薨贈大將軍尚書令大保謚文獻子長
嵩襲平國弟正國尚長樂公主拜駙馬都尉子平城早
卒孝文時始平公主薨追贈平城駙馬都尉與公主冥

婚壽弟多侯封長寧子位司衛監文成崩乙渾專權召
司徒陸麗麗時在溫湯療疾多侯謂曰渾有無君心大
王衆所望去必危宜徐歸而圖之麗不從遂為渾害多
侯亦見殺觀弟翰封西海王子龍兒降封公傳子豐國豐
國弟子弼有風格善自位置涉獵經史與長孫稚陸希
道等齊名然矜已陵物頗以此損孝文定氏族欲以弼
為國子助教弼以屈辭帝曰朕欲敦勵胄子屈卿先之
白玉投泥豈能相汙弼曰既遇明時恥沈泥滓會司州

牧武陽王禧入帝曰朕與卿作州督舉一主簿即命弼
謂之曰為帝所知宣武初為廣平王懷國郎中令數有
匡諫除中書舍人卒於華州刺史諡曰懿翰弟顓有才
力以侍御郎從太武征赫連昌勇冠一時賜爵泥陽子
拜司衛監從太武田崞山有虎突出顓搏獲之帝歎曰
詩云有力如虎顓乃過之後從征白龍討柔然以功進
爵建安公後出鎮涼州文成時歷征西大將軍督諸軍
征吐谷渾坐擊賊不進免官徙邊帝以顓著勲前朝徵

為內都大官卒贈征西大將軍建安王諡曰康子寄生
襲崇宗人醜善道武初率部歸附與崇同心戮力捍禦
左右拜天部大人居東蕃其子孫位亦通顯

奚斤

獻帝以長弟為達奚氏孝文改奚氏

代人世典馬牧父單寵於昭成時國有良馬曰騶駟一
夜忽逸後知南部大人劉庫仁所盜養於窟室單聞馳往
取馬痺仁以國甥恃寵慙而逆擊單單捽其髮落傷其

一乳及苻堅使庫仁與衛辰分領國部，軍懼遂奔衛辰。及道武滅衛辰，軍晚乃得歸，故名。位後於舊臣，斤機辨有識度，登國初與長孫肥等俱統禁兵，後以為侍郎，親近左右，從征慕容寶於參合，皇始初拜越騎校尉，典宿衛禁旅，駕還京，博陵勃海章武諸郡羣盜並起，斤與略陽公遵等討平之，從征破高車諸部，又破庫狄宥連部，徙其別部諸落於塞南，又進擊侯莫陳部至大娥谷，置戍而還，兩遷至晉兵將軍，幽州刺史，賜爵山陽侯，明元

即位為鄭兵將軍詔以斤世忠孝贈其父算長寧子帝
幸雲中斤留守京師昌黎王慕容伯兒謀反斤召入天
安殿東廡下誅之詔與南平公長孫嵩等俱坐朝堂錄
決囚徒明元大閱於東郊講武以斤行左丞相大蒐石
會山駕西巡詔斤先驅討越勒部於鹿那山大破之又
詔斤與長孫嵩等八人坐止車門左聽理萬機拜天部
大人進爵為公命斤出入乘輅軒備威儀導從太武為
皇太子臨朝聽政以斤為左輔宋廢主義符立國內離

阻乃遣斤收河南地假斤節都督前鋒諸軍事司空晉
兵夫將軍行揚州刺史率吳兵將軍公孫表等南征用
表計攻滑臺不下求濟師帝怒其不先略地切責之乃
親南巡次中山斤自滑臺趣洛陽長驅至虎牢遂平交
豫諸郡還圍虎牢及虎牢潰斤置守宰撫之自魏初大
將行兵唯長孫嵩拒宋武斤征河南獨給漏刻及十二
牙旗大武即位進爵宜城王仍為司空及征赫連昌遣
斤率義兵將軍封禮等襲蒲坂

魏書曰昌守將赫連乙升聞斤將至遣使告昌使至
統萬見大軍已圍城還告乙升言昌已敗乙升懼棄
蒲坂西走斤追敗之乙升奔長安斤入蒲坂收其資
器百姓安業昌弟助興先守長安乙升至復與助興
棄長安西走安定

斤又西據長安秦雍氐羌皆來附斤與赫連定相持累
戰破定定聞昌敗走上邽斤追至雍不及而還詔斤班
師斤請因其危平之

魏書載斤疏曰赫連昌亡保上邽鳩合餘燼未有盤據之資今因其危滅之為易請益鎧馬平昌而還世祖曰昌亡國叛夫擊之勞傷將士且可息兵取之未晚斤固執乃許之給斤萬人馬三千匹

乃進討安定昌退保平涼斤屯軍安定以糧竭馬死深壘自固監軍侍御史安頡擊昌禽之昌衆復立昌弟定為主守平涼斤恥以元帥而擒昌之功不在已乃舍輜重追定於平涼定衆將遁會一小將有罪亡入賊具告

其實定知斤軍無糧乏水乃邀斤前後斤衆大潰斤及將娥清劉拔為定所擒後太武尅平凉斤等得歸免為宰人使負酒食從駕還京師以辱之尋拜安東將軍降爵為公太延初為衛尉改為恒農王後為萬騎大將軍太武議伐凉州斤等三十餘人以為不可帝不從凉州平以戰功賜童隸七十戶又以斤元老賜安車平決獄訟諮訪朝政斤聰辨彊識善談論說先朝故事時有所得聽者歎美之每議大政多見從用朝廷稱焉真君九

年薨時年八十九太武親臨哀慟謚昭王斤有數十婦
子男二十餘又長子他觀襲太武曰斤闕西之敗國有
常刑以其佐命先朝故復其爵秩將收孟明之効今斤
終天年君臣之分全矣降他觀爵為公傳國至孫緒無
子國除太和中孝文追錄先朝功臣以斤配饗廟廷宣
武繼絕世以緒弟子監紹其後

叔孫建

獻帝以叔父之胤為乙旃氏孝文改叔孫氏

代人父骨為昭成母王太后所養與皇子同列建少以
智勇稱道武幸賀蘭部常從左右登國初為外朝大人
與安同等十三人迭典庶事參軍國之謀隨秦王觚使
慕容垂歷六載還累遷中領軍賜爵安平公出為并州
刺史後以公事免守鄴城園明元即位念前功以為正
直將軍相州刺史飢胡劉虎等聚黨叛假建前號安平
公督公孫表等討虎斬首萬餘級餘衆奔走投諸水死
水為不流晉將劉裕伐秦令其部將王仲德為前鋒將

逼滑臺兗州刺史尉建率所部棄城濟河仲德遂入滑臺乃宣言曰晉本意欲以布帛七萬匹假道於魏不謂魏之守將便爾棄城明元聞之詔建度河曜威斬建投其屍於河呼仲德軍人與語詰其侵境狀

資治通鑑曰魏主嗣使問太尉裕裕辭謝曰羌據洛陽本晉舊都晉自欲修山陵耳今假道於魏非敢為不利也

尋遷廣阿鎮將威名甚著久之除使持節都督前鋒諸

軍事楚兵將軍徐州刺史率衆自平原濟河徇下青兗諸郡遂東入青州圍宋刺史竺夔於東陽城宋遣將檀道濟王仲德救夔建不克而還以功賜爵壽光公

魏書載建表曰近聞南寇發軍尚北徐卓之已至彭城到彥之軍在泗口宜繕兵益戍先為之備且吳越之衆便於舟楫今至北土舍其所長逆順既殊勞逸不等平寇定功在於今日臣秣馬枕戈思効微節願陛下勿以為憂

與汝陰公長孫道生濟河而南仲德等自清入濟東走
青州太武以建威名南震為宋所憚除平原鎮大將封
丹陽王加征南大將軍先是簡幽州以南戍兵集於河
上一道攻洛陽一道攻滑臺宋將檀道濟王仲德救滑
臺建與汝陰公道生拒擊之建分軍挾戰縱輕騎邀其
前後焚穀草以絕其糧道道濟兵饑叛者相繼由是安
顛等得拔滑臺建沈敏多智東西征伐常為謀主容貌
清整號曰嚴明又雅尚人倫禮賢愛士在平原十餘年

綏懷內外甚得邊稱魏初名將鮮有及之南方憚其威
略青兗輟不為寇太延三年薨年七十三謚曰襄賜葬
金陵長子俊字醜歸少聰敏年十五內侍左右性謹密
初無過行以便弓馬轉為獵郎清河王紹弒道武閉宮
門明元在外紹逼俊為已援俊外雖從紹內實忠款仍
與元磨渾等說紹歸帝時帝左右唯車路頭王洛兒等
及得俊等大悅以為爪牙即位後稍遷衛將軍賜爵安
成公及朱提王悅懷亦入禁欲行大逆俊覺悅舉動有

異乃於悅懷中搜得兩刃七首遂執悅殺之帝以俊前
後功重軍國大計皆委之羣官上事先由俊銓校然後
奏聞性平正柔和未嘗有喜怒色忠篤愛厚不諂上抑
下每奉詔宣外必告示懇懇上下嘉歎泰常元年卒年
二十八帝親臨哀慟朝野無不追惜贈司空安成王謚
孝元賜溫明秘器載以輜輶車衛士導從陪葬金陵自
後有大功及寵幸貴臣薨賜賻送終禮皆依俊故事無
得踰之者初俊卒明元命其妻桓氏曰生既共榮沒宜

同穴能殉葬者可任意桓氏乃縊遂合葬于蒲襲爵
安同遼東胡人其先世曰世高漢時以安息王侍子入
洛歷魏至晉避亂遼東遂家焉父屈仕前燕慕容暉暉
為秦苻堅所滅屈友人公孫眷妹沒入苻氏宮出賜劉
庫仁為妻庫仁貴寵之同隨眷商販見道武有濟世才
遂留奉侍性端嚴明惠好長者之言登國初道武請兵
於燕王慕容垂同頻使稱旨為外朝大人與和跋等出
入禁中迭典庶事從征姚平於柴壁秦主姚興悉眾救

平同進討曰汾東有蒙阮東西三百餘里徑路不通興
來必從汾西乘高臨下直至柴壁如此則寇內外勢接
宜截汾曲為南北浮橋乘西岸築圍西圍既固賊至無
所施其智力矣從之興果視平屠滅而不能救以功賜
爵北新侯

魏書曰清河王紹之亂太宗在外使夜告同令收合
百工伎巧衆皆響應

明元即位命同與南平公長孫嵩並理民訟又紹同與

肥如侯賀護持節循察并定二州及諸山居雜胡丁零
宣詔撫慰問其疾苦糾舉守宰不法郡國肅然同東出
井陘至鉅鹿發衆欲脩大嶺山通天門闕又築城於宋
子以鎮靜郡縣護城同得衆心使人告同築城聚衆欲
圖大事

魏書曰太宗以同擅徵發於外檻車徵還尋以同雖
專命意在為公釋之

太武監國臨朝聽政以同為左輔及即位進爵高陽公

冀青二州刺史同長子屈明元時典太倉事盜官粳米數石欲以養親同大怒求戮屈自劾不能訓子帝嘉而恕之遂詔長給粳米同在官明察長於校閱家法脩整為世所稱及在冀州年老頗殖財貨大興寺塔為民所苦卒贈高陽王謚恭惠屈弟原雅性矜嚴沈勇多智略明元時為獵郎出監雲中軍事時夏主赫連勃勃犯河西原以數十騎擊之殺十餘人帝以原輕敵違節度加罪然知原驍勇遂任以為將鎮雲中柔然犯塞原輒破

之以功賜爵武原侯太武即位拜駕部尚書車駕征柔
然大檀分為五道又遷尚書左僕射進爵河間公原在
朝無所比周然恃寵驕恣多所排抑為子求襄城公盧
魯元女魯元不許原告其罪狀事相連逮歷時不決原
懼不勝遂謀逆事泄誅原兄弟外節儉而內蓄積及誅
後籍其財至數萬弟頡辨慧多策略有父風明元初為
內侍長令察舉百寮糾刺奸慝無所迴避嘗告其父陰
事帝以為忠特親寵之宣城王奚斤自長安追夏主赫

連昌至安定頡為監軍侍御史斤以馬多疫死士衆乏糧築壘自固遣太僕丘堆等督租民間為昌所敗昌遂驕矜日來侵掠

魏書曰時芻牧者不得出士卒患之

頡曰等死當戰死寧可坐受囚乎斤猶以馬死為辭

魏書載頡進計曰本奉詔誅賊今乃退守窮城不為賊殺當為法誅進退皆無生路而王公諸將晏然無謀何以報恩塞責斤以馬力不足尚須京師救騎至

為辭頡曰猛寇遊逸於外而吾等兵疲力屈士有飢色不一決戰死在旦夕何救兵可待等死當戰死何坐困乎斤猶以馬少為辭頡曰今兵雖無馬但將帥所乘可得二百騎請募壯勇出擊之且昌捐而無謀每好挑戰衆皆識之且伏兵掩擊可擒也斤猶難之頡乃陰與尉眷等謀選騎馬昌來攻壘頡出應之魏書曰昌于陳前自接戰軍士識昌爭往赴之會天大風揚塵晝昏衆亂昌退頡等追擊

昌馬蹶而墜頡頏昌送京師

十六國春秋抄云昌與魏戰於黑渠為魏所敗與數千騎奔還魏追騎亦至昌河內公費連烏提守高平徙諸城民七萬戶於安定以都之已魏軍至安定三城潰昌奔秦州魏東平公娥清追擒之送於魏與此不同

賜爵西平公代堆統攝諸軍夏至赫連定將復入長安詔頡鎮蒲坂拒之宋將到彥之寇河南以援定列守南

岸至於衡關太武西征定以頡為援軍將軍督諸軍擊
彥之遂濟河攻洛陽拔之進攻虎牢虎牢潰又同瑯邪
王司馬楚之平滑臺擒宋將朱修之李元德及東郡太
守申謨乃振旅還京師進爵為王卒謚曰襄頡為將善
綏士卒及卒宋士卒降者無不歎惜

庾業延代人後賜名岳其父及兄和辰世典畜牧稍轉
中部大人昭成崩苻氏內侮事難之間收斂畜產富擬
國君劉顯謀逆道武外幸和辰奉獻明太后歸道武又

得其資用以和辰為內侍長和辰分別公私舊畜頗不
會者道武恨之岳獨恭慎脩謹善處危難道武嘉之與
王建等俱為外朝大人參預軍國從平中原拜安遠將
軍官軍之警於栢肆也賀蘭部帥附力卷紇突隣部帥
匿物尼紇奚部帥叱奴根等聞之反於陰館宋室南安
公順討之不尅詔岳討叱奴根等滅之又討破離石叛
胡帥呼延鐵西河叛胡帥張崇等以功賜爵西昌公遷
鄴行臺岳為將有謀略衆服其智勇名冠諸將及罷鄴

行臺以所統六郡置相州即拜岳刺史秉法平當百姓稱之鄴舊有園池時果初熟丞吏送之岳不受曰果未進御吾何得先食其謹如此遷司空岳兄子路有罪諸父兄弟悉誅特赦岳父子候官告岳衣服鮮麗又行止風采擬儀人君遇道武不豫多所猜忌遂被誅時人咸冤惜之岳葬代西善無界後太武征赫連氏經其墓宅愴然改容詔為立廟冷一川之人四時致祭求其子孫任為帥者得岳子陵從征有功聽襲爵

王建廣寧人祖姑為平文后生昭成建少尚公主登國
初為外朝大人與和跋等十三人迭典庶事參預計謀
道武邊使燕王慕容垂建辭色高亢垂壯之還為左大
失建兄迴時為大夫諸子多不慎法建具以壯間迴父
子伏誅從征伐諸國破二十餘部又從征衛辰破之為
中部大人破燕王慕容寶於參合帝乘勝將席卷南夏
簡擇俘衆有才能者留之餘衆悉給衣糧遣歸令中州
咸知恩德建以為寶覆敗於此國內空虛獲而歸之縱

敵生患不如殺之帝曰若從建言非伐罪弔民之義諸將咸然建言建又固執乃阮之帝既而悔焉并州既平駕出井陘次常山諸郡皆降唯中山鄴信都三城不下乃遣衛王儀南攻鄴建攻信都等城建等攻城六十餘日不能克士卒多傷帝自中山幸信都降之已幸鉅鹿破寶衆於栢肆塢遂圍中山寶棄城走和龍城內空虛無主帝將乘勝夜入據守其門建貪而無謀意在虜獲恐士卒肆掠盜亂府庫請候天明帝乃止是夜徒何人

共立慕容普麟為主閉門固守帝悉衆攻之使人登巢
車臨城招其衆皆曰但恐如參合之衆故求全月日命
耳帝聞之顧視建而唾其面中山平賜建爵真定公加
散騎常侍冀青二州刺史卒陪葬金陵

魏書曰建子斤世祖時進爵淮南公後鎮長安假節
鎮西將軍信用左右調役百姓民不堪命南奔漢川
者數千家世祖遣按之斬斤以狗 愚按白起以坑
降戮身建以坑降斬子斤無足錄特錄以示戒

羅結

內入諸姓有叱羅氏孝文改羅氏

代人其先世領部落為魏附臣劉顯之逆翼銜鑿輿從
道武幸賀蘭部後賜爵屈地侯太武初累遷侍中外都
大官總三十六曹事年一百七歲精爽不衰帝以其忠
慈甚信待之監典後宮出入卧內因除長秋卿年一百
二十詔聽歸老賜大冢東川為私第別業并為築城號
羅侯城朝廷每有大事驛馬詢問年一百二十乃卒諡

曰真子斤從太武討赫連昌力戰有功歷四部尚書從
平涼州以功賜爵帶方公柔然侵境除柔玄鎮都大將
卒謚曰靜陪葬金陵子敦襲位庫部尚書卒子伊利襲
魏書曰伊利除內行長沉密恭勤顯祖親幸其家問
疾躬視湯藥歷官司農卿

婁伏連

內入諸姓有匹婁氏孝文改婁氏

代人代為首帥伏連忠厚有器量年十三襲父位領部

落道武初從破賀蘭部又平中山及征姚平於柴壁以
功賜爵安邑侯太武即位封廣陵公進為王後鎮統萬
薨謚曰恭子真襲降為公真弟大拔大拔孫寶字道成
性淳樸好讀書孝明時仕至朔州刺史時遣事屢興人
多流散及寶至稍安集之殘壞舊宅皆命葺構人歸總
路歲考為天下最後隨大都督源子邕討擊葛榮王師
敗績寶囚於榮軍變姓名匿行伍免害久之賊中有朔
州人識寶者謂寶曰使君寧自苦至此遂將詣榮笑曰

婁公吾方圖事何相見之晚因顧謂人曰此公行善天道報之得免亂兵即其驗也寶遇逃者密啓賊形勢規為內應天子感其壯志召寶第二子景賢授員外散騎常侍郎榮滅寶始得還永安中除假員外散騎常侍使柔然先是柔然稱藩上表後以中州不競書為敵國之儀寶責之柔然主驚謝曰此作書人誤遂更稱藩孝武立敕寶與行臺長孫子彥鎮恒農後從入關大統中累進儀同三司兼太子太傅攝東宮詹事為人清簡少言

頗諳舊事守靖謙恭以此為人所敬後行涇州事卒於
州

伏連兄曾孫毅魏書曰毅累官涼州刺史高祖南伐
毅表曰伏聞六軍雲動問罪荆揚但京邑新遷公私
草創兼往歲弗稔民多饑饉嗟惋易興天道悠長宜
遵養時晦願抑赫斯以待後日不從

閻太肥柔然人道武時歸魏尚華陽公主賜爵其思子
與弟並為正賓入八議明元即位為內都大官進爵為

侯

魏書曰泰常初為都將領禁兵討柔然獲其大將

宣城王奚斤攻虎牢大肥與娥清領十二軍出中道太
武初復與奚斤出雲中白道討柔然大檀破之後從討
赫連昌以功授滎陽公公主薨復尚濩澤公主

魏書曰又為都將擊大檀大破之 愚按大肥以柔
然種類效忠於魏亦變事也

太武將拜大肥為王遇疾卒

奚牧代人重厚有智謀道武寵遇之稱曰仲兄初劉顯害帝梁眷知之潛使牧與穆帝至七個山告帝錄先帝舊臣又以牧告顯功使敷奏政事參預計謀從征燕主慕容寶以功拜并州刺史賜爵任城公州與秦主姚興接界興頗寇邊牧乃與興書稱頓首均禮拜之責興侵邊不直興以與國和通恨之有言於道武道武戮之

和跋

內入諸姓有素和氏孝文改和氏

代人世領部落為魏附臣跋以才辨知名道武擢為外朝大人參軍國大謀雅有智算賜爵日南公從平中原以功進為尚書鎮鄴以破慕容德軍

魏書曰德使兄子和守滑臺和長史李辨殺和求援於跋跋帥輕騎赴之既至辨悔閉門拒守跋使說之乃開門跋入收其府藏德遣將率三千騎擊跋跋逆擊擒其將士千餘人陳穎之民多來向化

改封定陵公與常山王遵討賀蘭部別帥木易干破之

出為平原太守為道武寵任時羣臣皆敦尚恭儉而跋
好脩虛譽炫耀於時性尤奢淫帝戒之不革後北巡狩
山收跋刑之路側妻劉氏自殺以從初將刑跋道武命
其諸弟毗等視訣跋謂毗曰灑北地瘠可居水南就耕
良田廣為產業各相勸勵令之背已曰汝曹何忍視吾
死毗等解其徽意詐稱使者奔長安道武誅其家後太
武幸豺山校獵忽遇暴風雲霧四塞怪問之羣下僉言
跋世居此祠冢猶存或能致斯變帝遣建興公古弼祭

三牲霧即除太武蒐狩每先遣祭之

莫題

內入諸姓莫那婁氏孝文改莫氏

代人多智有才用初為幢將領禁兵道武征燕主慕容
寶寶夜犯營軍人驚駭有亡還京師者言官軍敗於柘
肆京師不安南安公順因欲攝國事題曰大事不可輕
爾不然禍將及矣乃止後封高邑公窟咄寇南鄙題時
貳於帝遺箭窟咄謂之曰三歲犢豈勝重載言窟咄長

而帝少也帝既銜之後有告題居處倨傲擬則人主帝乃使人示之箭告之曰三歲犢能勝重載否題奉詔父子對泣詰朝刑之

賀狄干代人家本小族世忠厚為將以平當稱稍遷北部大人登國初與長孫嵩為對明於聽察為人愛敬道武遣狄干致馬千匹結婚於秦主姚萇會萇卒興立因止狄干而絕婚興弟平寇平陽道武討平之擒其將狄伯支唐小方等四十餘人後興以駿馬千匹贖伯支而

遣狄干還帝許之干在長安習讀書史通論語尚書諸經舉止風流有似儒者初帝普封功臣狄干雖為興留還賜爵襄武侯及狄干至帝見其言語衣服類中國以為慕而習之故忿而殺之

李粟鴈門人昭成時父子入國粟少辨捷有才能兼具有將略初隨道武幸賀蘭部愛其藝能時王業草創爪牙心腹多任親近唯粟一介遠寄兼非戚舊數有戰功拜左軍將軍粟性簡慢矜寵不率禮度每在道武前舒

放倨傲不自祇庸笑唾任情道武即其宿過誅之於是
威嚴始厲制勒羣下盡謙卑禮自栗始也

論曰帝王之興雖則天命經綸所說咸藉股肱元桓穆
之際王迹未顯操舍託身馳驟自立功名可謂志識之
士矣而劉庫仁兄弟忠以為心盛衰不二純節所存其
意蓋遠而並貽非命惜身尉真兄弟忠勇奮發義以忘生
眷威略著時增隆家業穆崇夙奉龍顏早著誠款遂膺
寵眷位極台司至乃身豫逆謀卒蒙全護從享於廟抑

亦尚功世載公卿弈弈青紫盛矣奚斤世稱忠孝征伐
有尅平涼之役師殲身虜雖敗峭之責已赦封尸之效
靡立而恩禮隆渥沒祀廟廷叔孫建少展誠勤終著庸
伐臨邊有術威震夷楚俊委節明元義彰顛沛察朱提
之變有日碑之風加以柔而能正見美朝野安同異類
之人智識日用任等時俊當有由哉頡龠赫連昌推宋
氏衆遂為名將未易輕也庾業延見紀危難受事草創
智勇既申功名尤舉而不免傾覆命矣夫王建位遇既

高訐以求直參合之後不其罪歟羅結枝附葉從子孫
榮祿婁伏連間大肥並征伐著蹟策名前代奚牧和跋
莫提賀狄干李粟有忠勤征伐之效不能以功名自卑
俱至誅夷亦各其命也

南北史合注卷一百七